

東
華
續
錄

東華續錄

嘉慶十

臣王先謙敬編

臣周澗蕃恭校

秋七月丙戌諭正黃旗都統等奏據魁倫家屬呈繳房閒衣飾等項一摺並開單進呈魁倫前在川省辦理軍務種種玩延貽誤伊在潼河防守不力任賊匪乘閒竄渡荼毒無數生靈其獲罪實在於此至其平日居官操守實爲廉潔卽如魁倫前在福州將軍任內參奏閩省虧空一案彼時被劾多人皆係其讐怨之家魁倫若非平日並無劣蹟則結怨不少豈不慮人舉發今魁倫失機債事身獲重罪固由自取業經王大臣等定擬斬決因伊尙能廉潔所以寬其一綫不令其身首異處加恩賜令自盡見在魁倫名下應交官項亦多係閩海關應賠盈餘短少銀兩並非侵貪入己應行

追繳款項可比若魁倫果有翫法營私等事早應將伊家產查鈔何止僅著賠繳且計應賠之項爲數十萬二千餘兩卽將該家屬呈出房產悉數賠抵尙不及十分之一若全行入官必致合家流離失所伊妻究會爲一品命婦亦未便令其無所棲止著加恩將單內家下人住房一所三十四間賞給伊妻居住其餘照例入官所有不敷賠項竟行寬免至魁倫之子完顏扎拉芬前經降旨發遣伊犁效力贖罪魁倫貽誤軍務獲罪甚大伊子自難輕貸但魁倫止有此子其孫亦尙在襁褓若令其年久遠戍伊妻未免無人照料著再格外加恩准令伊子於到戍效力三年屆滿後卽令該將軍等奏明釋回到京日交該旗挑補馬甲賞給錢糧一分俾資養贍仍不准挑補別項差使此係朕憐念魁倫平日官聲尙好曲加矜恤以示法外施仁之意總之服官奉職首尙清廉果能自勵

清操卽身蹈愆尤尙可仰邀末減其子嗣亦得格外蒙恩大小臣工不可不砥礪廉隅共相勛勉也至魁倫去年曾經面奏請八旗官員人等於本名上各繫姓氏所見甚謬朕彼時旣經面飭未經准行而伊子仍以完顏冠於本名之上殊屬非是著於本名扎拉芬上除去完顏二字並將此通諭知之○戊子改山東糧船爲冬兌春開○辛卯命京營右翼總兵長齡爲領隊大臣領吉林黑龍江兵赴湖北軍營協剿○貴州巡撫琅玕奏擒勦廣順等寨滋事青苗楊文泰等得旨嘉獎加總督銜○癸巳轉楚克扎布爲理藩院左侍郎以和甯爲理藩院右侍郎

由內閣學士遷

○甲午諭軍機大臣

等前據馬慧裕奏寶豐郊縣地方有匪徒焚掠之事旋據葉縣稟報盤獲首犯劉之協本日馬慧裕馳奏已將寶豐等處匪徒千餘名悉數殲除並提到眼目認明劉之協屬實劉之協爲教匪首逆

句連蔓延荼毒生靈乃該犯仍敢在豫省糾結潛謀起事並欲爲
陝楚教匪接應實堪痛恨仰賴 昊穹垂慈 皇考默佑俾豫省
新起教匪一千餘人立時勦捕淨盡擒獲首逆明正刑誅可見教
匪劫數已盡從此各路大兵定可剋期蒞事朕於欣感之餘轉覺
惻然不忍蓋教匪本屬良民止因劉之協首先簪鼓附從日眾征
兵勦辦已閱數年無論百姓無辜橫遭殺戮被脅多人迫於不得
已卽真正白蓮教皆我大清國之赤子止因一時愚昧致罹重罪
至各股賊首先後就誅者如張正謨聶傑人等加耀林之華齊王
氏姚之富王三槐冷添祿羅其清高均德龔建卜三聘王登廷張
漢潮冉添元陳士俸楊開甲龐洪勝等無不身受極刑全家被戮
雖孽由自作亦係聽從劉之協倡教而起白蓮教獲罪於天自取
滅亡其頑梗可惡其愚蠢可憐朕仰體 上天好生之仁於萬無

可貸中寬其一綫著經略額勒登保參贊德楞泰及各路帶兵大員並各督撫等將劉之協擒獲一事廣爲宣播並傳諭賊營伊等教首已就誅戮無可附從至於裹脅之人本係良善百姓何苦爲賊所累自破身家如能翻然悔悟不但免誅並當妥爲安置卽實係同教畏罪乞命棄械歸誠亦必貸其一死若經此番曉諭之後仍復怙惡不悛則是伊等甘就駢誅大兵所到殲戮無遺亦氣數使然不能復加矜貸額勒登保等鼓勵將士務於今秋迅掃賊氛奠安黎庶同膺懋賞將此傳諭額勒登保德楞泰明亮陝西甘肅四川湖北各督撫知之○諭各省督撫每年奏報收成分數後續有旱澇蟲傷致減分數者仍據實入告○乙未中元節 上以高宗純皇帝升祔後特詣 奉先殿致祭○丙申禮部尙書德明卒贈太子少保予祭葬諡恪勤○丁酉以達椿爲禮部尙書書敬

為左都御史調文甯為吏部右侍郎以英和為禮部右侍郎

由內閣學士

○戊戌定各省駐防生員仍歸佐領約束文藝由府學教授課

閱○甲辰德楞泰等奏督勦樊人傑等四股賊匪殺賊四千餘人

得旨獎賚寶授勒保四川總督賞二品頂帶○以普恭廣音俱為

內閣學士

普恭由詹事府音由光祿寺卿遷

○丙午諭裘行簡已補授太僕寺少

卿著仍在軍機章京上行走嗣後軍機章京有升任通政司副使

大理寺少卿者即著軍機大臣奏明不必在軍機章京上行走○

丁未賜暹羅國王鄭華敕諭曰據兩廣總督吉慶廣東巡撫瑚圖

禮遞到國王進香祭文一道表文一道鑒王忱惻增朕悲懷惟外

藩使臣向無謁陵之例上年安南國王阮光纘遣使赴京進香

曾經敕諭以高宗純皇帝業經奉移山陵計使臣到京已在

永遠奉安之後令該國使臣不必來京將所備儀物齎回用示體

恤今暹羅國王遣使赴京事同一例朕怙冒萬國於海徼藩封並無歧視所有該國王呈進儀物方物仍飭疆吏發交使臣齎回以免跋涉該國王具悉朕意益矢虔恭永承優眷欽哉特諭○己酉諭軍機大臣等陳傑一股賊匪雖爲數無多但越過棧道若竄入南山不特搜捕費力恐致牽綴官兵今額勒登保將陳傑生擒埽除餘黨所辦甚好見在陝甘東北一帶賊匪已盡止餘伍金柱張世龍冉學勝等股向西和成縣西南一帶奔逃額勒登保自東而西長麟等自西而東兩面夾擊務將陝甘兩省賊匪一律肅清朕惟計日以待捷音之至○予明亮三品頂帶○撥山西藩庫銀五十萬兩備陝西軍需

八月壬子諭永保從前在鍾祥北面防堵賊匪所帶官兵共有九千餘名乃不能實力攔截致令賊匪於嘉慶元年向北奔竄焚燒

漳河鎮繞至黃龍塢偷渡滾河是以 皇考將永保革職拏問解
交刑部監禁 諭令侯大功告成再行降旨因軍務尙未辦竣未
卽 施恩上年朕親政之初卽仰體 聖意將永保釋放賞給藍
翎侍衛令齎經略印信前赴軍營旋即擢授頭等侍衛令其署理
陝西巡撫是永保從前應得之罪業經原有伊署理陝撫任內帶
兵在華林山剿辦賊匪適因賊多兵少致有敗衄如果永保據實
具奏則勝負兵家之常原不遽加之罪乃永保不敢以實陳奏仍
復隱飾其詞其罪實在於此嗣後與明亮分投堵剿賊匪永保遂
形氣餒在大山岔株守不進其逗遛之罪亦無可辭復降旨革職
拏問經大學士九卿等會同審訊定擬斬候但覈其情節尙係軍
營通弊卽勒保明亮上年逮問時其遷延玩誤之處皆所不免朕
於勒保明亮業經先後施恩亦不肯於永保一人獨加重罰况永

保之父溫福前在木果木陣亡究屬歿於王事勒保見在辦理軍務亦屬出力而永保之罪尙非必不可原本欲將伊赦出發往軍營贖罪惟永保屢經效力戎行俱曾獲罪是其於軍旅之事實非所能且於帶兵不利見在各路軍營連次克捷大功指日告成軍營將領亦不少伊一人永保著加恩釋放賞給八品領催自備資斧前赴烏里雅蘇台跟隨縣佐辦事以觀後效至景安從前在河南巡撫任內恒怯無能並不帶兵堵剿惟擇無賊地方駐守若

皇考知其畏蕙情節必卽加之重罪伊至南陽堵截時又不能實力防禦致賊匪於二年復由羅山南召等處竄至盧氏從武關闌入陝境擾及川省種種縱賊之罪若蒙 皇考鑒悉早將伊立正典刑惟因軍營惡習率多謊詞入告又無人將伊參劾是以倖免本年朕將數年來貽誤之封疆大吏各加懲治將景安一併革職

孝問經大學士九卿定擬斬決施恩改爲斬候但景安應得罪名
事屬已往且賊匪到處奔竄地方不能堵禦何獨景安爲然亦不
值因內地亂民鋌走稽誅卽將所到省分之督撫等槩真於法况
景安之罪究係追論尙可寬其一綫著加恩改爲緩決仍牢固監
禁此朕於軍營獲罪大臣格外施恩苟情節稍有可寬必不肯遽
行誅戮若罪在不赦亦不能廢法曲貸也將此通諭知之○丙辰
諭軍機大臣等台布奏王文雄殺賊陣亡所有原帶兵丁已派令
海洪阿前往招收擬俟粵兵到彼一併交與綸布春九十馬玉魁
帶領勦辦西鄉賊匪亦止可如此辦理高戴等逆前旣戕害扎勒
杭阿今王文雄又被賊圍困力戰陣亡實爲可恨卽被勦窮蹙懇
請投降亦斷不可准所有此股賊匪卽著交綸布春併力勦辦務
須速行擒獲盡法處治以伸國法而慰忠魂○增設陝西甯陝城

守營都司○予陣亡固原提督王文雄三等子爵賞銀一千兩治喪○壬戌命各督撫甄別知府直隸州知州○甲子河南教匪首逆劉之協伏法○丁卯諭軍機大臣等額勒登保奏冉學勝張世隴二逆接踵至陝高二馬五戴家營等股賊匪前此竄入西鄉勢甚猖獗今冉張二逆又復相繼而至該處情形甚關緊要恆瑞惟當與長麟綸布春等併力勦捕斷不可令賊匪竄過漢江以北又入南山老林以致辦理棘手○緩徵甘肅近賊之岷州二十一廳州縣及西固二州同所屬額賦○額勒登保奏殲斃石子溝賊首伍金柱得旨獎賚○戊辰諭吏部議處給事中甘立猷降一級調用一摺前據按檢王大臣奏頭場交出懷挾之監生甘紹烈照例辦理朕於召見臣工時詢知係給事中甘立猷之子而甘立猷係原任尙書甘汝來之孫伊子甘紹烈既有交出懷挾之事卽應具

摺請罪乃遲至二日並未奏陳其意竟欲隱瞞蒙混殊不知朕於鉅細政務無不詳加訊訪此等事件豈容涸過卽臣工中經朕垂詢又誰敢代爲隱瞞甘立猷旣不能約束於先又思隱飾於後實屬非是因降旨將該員交部嚴加議處察聞甘汝來係舊日大臣中之有名望者因令國史館取進甘汝來列傳閱看俟部議上時降旨茲據吏部將甘立猷照例議以降一級其不行具奏之處係屬私罪所降一級不准抵銷實屬咎所應得且甘立猷平日居官聲名平常卽著照部議降一級調用至伊子甘紹烈年甫十五六歲係初次觀場未諳例禁究因伊父失於管教所致且係甘汝來曾孫甘汝來從前在知縣任內頗爲風厲歷任居官亦能持正身後飾終之典蒙 皇考恩施優渥而甘紹烈止係年幼無知且已經革去監生枷責科罪已足示儆甘紹烈著加恩仍准原名應試

以示朕眷念舊臣準情宥過至意嗣後大臣官員務當課督子弟嚴加約束而爲子弟者亦當顧惜家聲讀書自愛儻有不自檢束輕身試法者不但將該生按例辦理必將伊父兄一併治罪決不寬恕○庚午諭向來外省各督撫等發遞本章及摺奏事件皆先行跪拜親授所差員弁齎捧禮固宜然至在京王公內閣部院及八旗各營大臣等應奏事件較多固非外省可比然亦應親自遞奏乃近來王公大臣日久相沿多不親赴宮門率令護衛太監司員筆帖式章京驍騎校等代爲遞奏殊非敬謹之道嗣後各王公大臣等於自行陳奏事件務須親身呈遞卽各部旗衙門公遞事件亦應專值堂官一人親身到宮門遞交奏事官員轉奏如有仍前派交護衛太監司員章京等代遞並無一人親到者奏事官不准接受並將該堂官交部議處再各王公及部旗大臣等帶領官

員引見後往往卽在丹墀之下傳宣諭旨而引見官員亦在乾清門內擁擠聽候殊非體制此後每逢引見官員日著御前大臣派出乾清門侍衛二三員於官員引見後告知帶領引見之大臣官員等令其退出乾清門再行傳旨卽大臣中有在內廷行走者亦應於宮門外傳宣諭旨後再行進內儻帶領引見之大臣等有仍在丹墀下傳旨者卽著御前大臣指名參奏○乙亥諭向來軍機大臣出差隨帶軍機章京原以堂司統屬故令帶往辦事乃年來出差及簡放外任大員如阿迪斯長麟長齡等並非軍機大臣亦在朕前率意請帶軍機章京殊屬非是大臣等奉派出差各有屬員可以隨往何必將素非所屬之員帶往辦事至簡放外任向無隨帶京員之例况軍機章京見有定額若出差大臣俱請帶往軍機處安得有如許人員且難保無軍機章京向出差大臣營謀前

往沿途倚仗軍機處虛張聲勢此時軍機大臣實皆小心謹慎不敢作福作威章京等亦皆奉公守法若屢派出差恐小軍機之故態復萌沿途又受苦累是朕並非欽派各大臣出差竟係派軍機章京出差矣嗣後出差人員除軍機大臣等仍准其隨帶軍機章京外其餘如有率行奏請者即將該大臣治罪另行簡派○定謀財害命有關服制者斬梟例○額勒登保奏殲斃麻池溝賊首宋麻子等得旨獎賚○丙子改江蘇蕭南通判爲同知邳北同知爲通判○戊寅諭朕恭閱乾隆六年 實錄內載左都御史劉統勳條奏二疏一以大學士張廷玉歷事 三朝晚節當慎外閒輿論動云桐城張姚兩姓占卻半部摺紳此卽盈滿之候爲傾覆之機所伏請令張廷玉會同吏部將張姚兩姓部冊有名者詳悉查明若係親房近支累世密戚開列奏聞三年之內停其升轉一以尙

書公訥親承辦事務太多任事過銳請量行省減各等因詞義極爲嚴正其時我 皇考整飭紀綱勵精圖治大臣中尙無翫法營私者卽張廷玉訥親二人亦無款蹟可指而劉統勳獨能抗疏指陳豫防盈滿其意自以見及張廷玉訥親聲勢赫奕形迹之間晚節難保故爲此防微杜漸之奏迨數年後張廷玉因事獲譴訥親身罹重罪各如老成先見是劉統勳立朝風節實能侃侃不阿是以仰蒙 皇考眷注優隆用爲大學士身故後飾終備禮易名之典 賜諡文正而其子劉墉亦擢任綸扉受 恩兩世可見臣工建白惟當於用人行政諸大端剴切敷陳以收兼聽並觀之效不在毛舉細故敷衍塞責也卽如和珅從前專擅貪黷各款若諸大臣及有言責者能早爲參奏 皇考必立將和珅懲治和珅亦不敢恣意妄行是轉可保全末路何至釀成巨案耶嗣後臣工等居

心立言皆當以劉統勳爲法其大臣中有所管事務雖多並無私弊者固不必有意苛求儻所管事務雖少而有專擅營私不公不法等事卽當據實指參以期肅清朝列裨益政事君臣一德庶幾可望郅治矣○己卯諭禮部奏四川酉陽州屬秀山縣於乾隆五十三年設學未定拔貢之額今據四川學政陳希曾咨稱已與雅州酉陽兩舊學一體各拔一名係援照乾隆四十一年前任學政吳省欽咨部選拔彰明縣學額之案辦理錯誤照例不准一摺學校事關名器卽增一童生進額亦必遵例奏請況選拔貢生尤宜慎重從前吳省欽遵行咨部而部臣輒行咨准之處均屬錯誤姑念事隔多年吳省欽業已革職禮部堂官亦俱已更換物故均著免其查辦至學政陳希曾咨部選拔亦有不合但係相沿舊案除所增拔貢二名照部議不准外陳希曾亦著加恩免其議處嗣後

各省學政遇有添增貢額等事務當循照增添學額之例一體奏

明請旨不得咨部辦理以杜冒濫○以書敬為廣州將軍祿康為

左都御史轉文甯為吏部左侍郎調多永武為吏部右侍郎高杞

為戶部左侍郎以伊桑阿為刑部右侍郎由庫車辦事大臣遷○轉英和為

禮部左侍郎以扎郎阿為禮部右侍郎由內閣學士遷

九月庚辰朔以陝西咸甯等三十八廳州縣旱災撥山西藩庫銀

三十五萬兩備賑○壬午 上啓鑾謁 東陵○命經過地方額

賦已蠲免十分之八者全行蠲免○乙酉 上謁 昭西陵 孝

陵 孝東陵 景陵 裕陵回鑾○丙戌申諭各督撫毋奏留升

任他省人員○戊子 上還京師○辛卯命貴州總兵官以下聽

巡撫節制○癸巳賜尚書朱珪孫涂舉人○甲午德楞泰等奏殲

逆首唐大信○乙未撥山西藩庫銀七十萬兩備陝西軍需○

庚子命武鄉會試不拘翼分派副都統一員入場彈壓○辛丑賜
故朝鮮國王李祘諡恭宣以其世子玠爲朝鮮國王命署散秩大
臣明俊內閣學士納清保往封○壬寅台布以運餉遲延降調以
陸有仁爲陝西巡撫祖之望爲刑部右侍郎馬慧裕爲湖南巡撫
先福爲河南布政使董教增爲四川按察使由候補道遷○命陝安鎮
總兵官慶成在漢中專辦堵剿事宜暫護陝西巡撫○甲辰以阿
隆阿爲內閣學士由副都統遷

冬十月辛亥諭軍機大臣等此次德楞泰勒保分剿劉朝選湯思
蛟等股賊匪多有斬獲復會剿趙麻花等將該逆戮斃並殲淨餘
匪實爲奮勇可嘉前據姜晟奏楚省藍黃白綫賊匪俱將折回川
境已令明亮跟蹤緊剿此時德楞泰勒保在雲陽一帶正係折川
來路可與明亮兩面夾擊一鼓殲擒轉不必將賊匪截回楚境再

徐添德一股已竄赴安康平利一帶今摺內又稱王珊等欲赴太平接取可見該首逆亦有入川之勢並當派委得力鎮將前往迎截漸次偪入川境雖川陝楚均關緊要但賊匪竄至陝楚必致散漫不如聚集川境殲除較易德楞德勒保不可不知此意○丁巳

胡季堂以疾免以顏檢護理直隸總督同興署直隸布政使喬人傑署直隸按察使

山清河道署

○戊午諭軍機大臣等王珊一股匪眾

經德楞德勒保督率將領分路兜截殲擒淨盡川東腹地肅清所辦甚屬可嘉且據稱與額勒登保彼此札商欲將陝省之賊全數偪入四川以便併力圍攻覽奏更爲深慰數年來陝甘四川湖北各股竄匪雖疊經官兵痛剿但賊情狡猾奔竄靡常而各省帶兵大員又不免各存意見僅將該省之賊驅偪出境卽爲了事不復顧及鄰省其鄰省帶兵之員亦復如是賊匪展轉奔竄日就蔓延

最爲軍營惡習今德楞泰勒保能見及此籌慮大局可謂無分畛域不愧大臣任事之道見在嘉陵江一帶防守最關緊要各股竄匪因通巴境內寨砦密欲圖竄越若嘉陵江防堵不嚴又致偷渡擾及川西完善地方更復成何事體德楞泰等務須加意防範不可稍有疏虞至勝兵所到之處賊匪等窮蹙畏懼自必紛紛乞降德楞泰勒保當察看光景如果賊匪誠心投出自應允准受降但賊情狡詐不可不加意嚴防恐該匪等被大兵勦急計無所出相約詐降勾結轉爲大營肘腋之患此最應隨時留心者德楞泰勒保尤當慎之又慎也○庚申諭軍機大臣等高二馬五二逆狡詐異常奔越數省今長齡探得該匪屯聚洵陽之王家坪一帶分派滿漢官兵同時並進奮勇衝殺殲擒賊匪七百餘名所辦可嘉之至前因長齡素未經歷戎行降旨將所帶官兵歸入額勒登保

隊內聽候調撥此時賊鋒大挫正當乘勢搜捕見已諭知額勒登保毋庸令長齡前赴大營所有高二馬五一股賊匪卽責成長齡協同勦辦務將此股逆匪在洵陽地方速行勦淨如不能卽時勦滅亦應偪向西面以便額勒登保迎頭截擊或向西南偪入川境斷不可令其折竄楚省二竹一帶亦不可令其越過漢江西北逸入商雒等處致搜捕又稽時日總須將此股迅速勦除若賊匪垂敗不可又棄而之他如那彥成前此不將高馬餘孽勦竣貽累至今也○壬戌諭上年推恩宗室准令應試原定以辛酉正科爲始本年舉行恩科因給事中慶岱奏試期較近恐宗室等於舉業一時未能嫻習請暫停本年鄉試當經降旨允准仍以辛酉正科鄉試爲始但思宗室應試若與士子等一同入闈於體制究有未協溯查乾隆年間曾兩次舉行是典自有舊規可循見當久經停止

之後其應如何酌定章程及一切事宜著軍機大臣會同宗人府禮部詳察妥議具奏尋議一宗室應試請照八旗例由宗人府考試馬步箭挑取合式者奏請簡派王大臣覆試後再行錄科其奉天宗室由宗學考試馬步箭合式者就近咨送奉天將軍覆試錄科送京一貢院局試鄉試於八月初四日點名入場會試於三月初四日點名入場由宗人府派出章京數員在甌門識認至龍門外由御史點名散卷歸號並請於左右宗人內先期簡派一員彈壓巡查懷挾亂號等事如有前項情弊交宗人府自行辦理其營弁號軍等交監臨知貢舉酌量應用若干人於初三日先行點進一考試擬用制藝一篇五言八韻排律詩一首由順天府禮部先期奏請 欽命題目於點名日令宗人府府丞赴乾清門恭請捧至貢院交監臨知貢舉送入內簾啓封刊印俟點名封門後交出

散給卽於初五日交卷出場一印卷照鄉會試例由順天府禮部
備卷鈴印交監試御史鈐用坐號散給交卷後送外簾彌封不必
謄錄送內簾主考總裁擬定中式名次封交至公堂鄉試派順天
府官一員會試派禮部司官一員同宗人府章京一員捧至乾清
門交奏事處呈遞 欽定名次後鄉試由監臨會試由知貢舉拆
名填榜屆期由宗人府派員至貢院外接榜宗人府衙門前張榜
試卷交順天府禮部存查中式人員應得旗扁銀兩表裏段匹照
例給予一中額鄉試應由順天府將試卷數目開單進呈 欽定
中額其會試中額初次人數無多應令總裁擇其文理優長者封
卷進呈恭候 欽定至數科後會試人數增多仍由禮部覈明試
卷數目請旨定額一殿試朝考奉旨與新進士一體應試應請同
日入考坐次及引見排班均列在新進士前由該衙門一體帶領

引見或用翰林或用部屬其未授職進士及取中舉人應如何選
用請交吏部議奏一凡宗室祖孫父子及同胞叔姪兄弟應行回
避外其餘槩毋庸回避一查乾隆年間宗室會考試繙譯嗣後凡
考試繙譯鄉會試之年亦應照文場鄉會試例辦理取中者應如
何選用亦交吏部議奏從之○癸亥明亮以不能剿賊降藍翎侍
衛以長齡爲宜昌鎮總兵官○甲子撥部庫及廣儲司庫並山西
藩庫銀各二十萬兩備四川軍需○以張標餘黨就獲復原任直
隸總督胡季堂太子太保○德楞泰等奏獲首逆張子聰得旨獎
資○戊辰調姜晟爲直隸總督書麟爲湖廣總督以琅玕爲雲貴
總督伊桑阿爲貴州巡撫瑚圖靈阿爲刑部右侍郎賡音爲盛京
刑部侍郎由內閣學士遷○太子太保原任直隸總督胡季堂卒贈太子
太傅遣御前侍衛豐紳濟倫帶領侍衛十員往奠茶酒予祭葬諡

莊敏○己巳諭軍機大臣等本日倭什布等六百里報到仍不過
籌辦堵剿情形自係明亮接奉前此令其追賊入川諭旨伊未經
前往故以此奏塞責而倭什布亦隨同列銜但明亮等前奏以陝
賊竄楚緊要爲詞帶兵趕赴二竹迎剿今又不駐二竹轉在豐溪
無賊地方駐紮老奸蒼滑巧於趨避實不知其是何肺腸至倭什
布係湖北巡撫堵剿是其專責乃亦並不認真出力惟知附和因
循無能已極外省惡習總以朕所差出之人朕必回護其短殊不
知朕之心至公至正卽如那彥成台布以及魁倫皆朕去年所用
何嘗有所回護耶伊等旣以邊防自任所有楚省防堵各事宜卽
責成倭什布帶同明亮嚴密守禦儻稍有疏懈無論川陝竄匪由
何處逸入楚境惟倭什布等是問○庚午調張長庚爲貴州按察
使成甯爲湖北按察使○調文霈爲陝西按察使王文瀾爲山西

按察使○調秦鳳爲湖南按察使百齡爲浙江按察使○癸酉撥
山東江西藩庫銀各二十五萬兩備陝西軍需○截留江西銅山
等七州縣漕糧四萬石有奇賑徐州府屬水災○乙亥諭整飭吏
治以清廉爲本蓋必有守然後可責以有爲若操守先不可問則
一切措施皆屬昏瞶不能治己焉能治人此貪墨之風首當嚴懲
也向來秋審朝審案犯其常犯內多係謀故殺人及因姦盜問擬
死罪者若官犯則少此等情節自因身列仕途習知法律不敢任
意妄爲而身罹重罪者每由於貪黷前車已覆後轍相循夫以寒
素之士一旦食祿於朝已可贍及身家若簡擢外任則養廉尤厚
焉有一行作吏較之未經服官以前轉形匱乏何欲壑之難盈如
蛾投火實堪悲悼推原其故總由恣情糜費日事奢華以致廉俸
所入不足供其揮霍因而敗檢踰閑多方婪索伊等豈不知得受

賊款律有明條而利令智昏遂自蹈重譴而不顧當其計肥囊囊雖未必顯有干係民命之事然督撫司道等則取之州縣州縣則取之百姓層層剝削無非苦累良民罄竭脂膏破家蕩產且有不勝撈掠自戕軀命者不知凡幾較之謀故罪孽更重此等賊私敗露之員既經按律定擬憲典昭然豈能曲爲寬貸 祖宗所定刑章朕實不敢廢法沽名本日句決朝審官犯富綱鄭源璠二員均因賊獲罪其所定罪名皆係內外問刑衙門詳細推鞠始定爰書朕豈豫有成心亦實不願臣工等獲此不赦之誅也卽本年秋審案犯因屢次停句經朕再三酌覈凡有一錢可原免其句決者共有一百八十餘名予句者尙有一千三百八十名此皆求其生而不得朕實懷哀矜勿喜之誠不但愚民犯法務存欽恤卽邪教匪徒每次軍營報到閱至官兵殲戮賊匪多名亦係赤子弄兵潢池

未嘗不爲之憐念何況臣工屢經拔擢至大僚者惟望其各矢公廉共襄邇治豈忍以一朝觸法卽予刑誅而貪吏之弊必至害民此而稍存姑息勢必無所顧忌民困莫伸釀成重案轉非辟以止辟之道嗣後內外大小臣工務當喻朕懲貪執法不得已之苦心潔清自矢儉以養廉以期吏治激清閭閻安堵無負朕諄諄訓誡將此通諭中外知之○以截勦鐵掘寨等處竄匪功賞已革翎頂之湖北巡撫倭什布四品銜以監翎侍衛明亮爲領隊大臣

十一月乙酉多永武以引禮舛錯降調調范建豐爲吏部右侍郎以那彥寶爲兵部右侍郎吉綸爲內閣學士

由太常寺卿遷

○睿親王溥

穎薨子寶恩襲爵○丁亥 上臨睿親王溥穎第賜奠○諭朕本

日親臨睿親王溥穎邸第奠醑見其屋宇窄狹因詢知尙無墊地深爲憫惻著加恩於例賞外由廣儲司庫加賞銀五千兩爲置墊

之費以示眷注優恤至意○己丑諭向來翰林院編修檢討遇有京察保列一等引見記名者與開坊各員一體簡放道府但編檢止係七品而道府則係四品職級相去甚遠乃編檢等一經保列記名卽邀簡用道府未免太優且編檢職係詞垣其由掌院學士保列一等者大率因其學問較優年力精壯登之薦牘引見時量予記名並非考試優等者可比該員等卽長於文藝究未經歷政務於地方民事豈能諳習遠膺方面恐不免致有貽誤嗣後除業經開坊之翰詹等官及修撰京察一等記名外用者遇有道府缺出仍開列諸旨外其編修檢討京察一等記名外用者遇有同知直隸州知州缺出開列簡放著爲令○庚寅諭昨已降旨將翰林院編修檢討京察一等記名外用者遇有同知直隸州知州缺出開列簡放原因編檢與道府品級相去較遠遽加擢用未免過優

今思編檢簡放止係按照俸次其京察引見准列一等者未必俱係俸深人員嗣後編檢各員遇有坊缺著將京察一等記名之員於引見排單將頭牌及開列本內詳細註明如各該員開坊後遇有道府缺出卽一體開入簡放著爲令○癸巳賜賢良後裔原任大學士吳璵四世孫拔貢生沈福建巡撫潘思桀曾孫監生福舉人○乙未定左翼總兵官駐正陽門外右翼總兵官駐圓明園移圓明園副將駐樹村以資巡緝○丙申飭京察保薦崇實黜華○以軍機處宜嚴密肅清命科道一人進內稽查○丁酉諭軍機大臣等大學士九卿議駁費瀆等奏請將江蘇浙江應徵輕齋折色銀兩改徵本色一摺已依議行矣此事前經蔣兆奎奏請嗣又有浙江旗丁儀洪達等在戶部具呈俱經戶部議駁昨復據費瀆錢保岳起阮元聯銜具奏仍請將輕齋之項以六成改徵本色四成

竟予豁免費酒等四人平日辦事尙屬認真所奏原係爲公起見但先經戶部議駁而大學士九卿又以爲事屬難行朕豈肯違眾臣之公議獨准伊四人之奏乎況此項輕齎每石原定折銀五錢本係國家薄斂愛民之意行之百有餘年相安已久豈容輕議更張若如該督撫等所議改徵六成本色豁免四成亦似不欲累民殊不知以六成本色所值而論較之原定十成折價已不啻多至一倍有餘是小民虛受四成豁免之恩轉受六成本色之累與加賦何異朕聞近日各省酒務名爲肅清其實浮收之弊未能盡除該督撫等雖潔己自愛而於州縣收酒種種弊竇不能實力糾察嚴參大法而小不廉有清漕之名仍無清漕之實實爲近來通病比之六部京堂皆知奉公守法而司官書吏任意行私朕安用此等尙書侍郎爲耶直省大吏比古諸侯豈可不以用人爲先務司

事者不思正本清源漸除積重難返之弊勤以辦理清漕旗丁運費卽有不敷喫喫續請此非真爲調劑漕務起見不過聽不肖屬員愆愆仍欲顯蹈從前浮收惡習耳况本年各省漕船屆期抵通並無遲誤其運丁之辦理並無竭蹶卽此可見乃該督等或以本年漕運係多方設法始能無誤竟似明年漕運若不另加籌畫恐致輓運維艱豫爲站腳地步此事惟在費淳鐵保岳起阮元等悉心籌畫認真經理總期於運務有益而不至苦累小民方爲正辦若明年漕運稍有稽遲惟伊等四人是問○戊戌諭昨經降旨令六十歲以上滿漢大臣俱於黎明入朝用示體恤因思大臣等進內例應於五鼓親向奏事官員恭遞膳牌若俟黎明始行親遞則奏事官員書寫不及膳牌必致貽誤嗣後滿漢大臣年至六十以上者其膳牌著加恩准令筆帖式代遞儻是日未能進朝須先期

告知筆帖式勿令呈遞如膳牌已遞經朕召見而本人有未到者與奏事官員及代遞之筆帖式俱無干涉惟當治本人以應得之咎其餘六十歲以下之滿漢大臣仍著照例親遞膳牌以符體制○命詹事府京察及一應事宜仍照舊例辦理無庸翰林院掌院學士兼管○庚子諭軍機大臣等據額勒登保奏懇請入覲面陳密奏等語殊屬非是朕從前原以額勒登保忠勇誠篤辦事認真將伊授爲經略大臣總統軍務以來尙能妥協嗣聞賊匪分股渡江四散奔突伊卽親領大兵跟躡賊蹤繞路堵截迎擊所辦甚是至賊匪分路逃竄亦係事所常有前次慶成於賊匪偷渡漢江未能堵禦妥協朕尙加恩寬宥今豈肯因額勒登保未能將賊匪圍困一處痛加剿除卽行將伊治罪乎且額勒登保久歷戎行聲名素著兵弁欽服賊匪畏懼今若一時令其來京必致各將備心緒

離亂賊勢鴟張至伊摺內所言扎克塔爾楊遇春不過善於打仗豈能統理軍務額勒登保係辦理國家要務之人理宜無庸顧慮一切惟當相度機宜果斷從事且軍營中如有掣肘之處即可密爲陳奏其奏請陛見來京殊屬悖謬著傳旨申飭前次松筠那彥成等奏請來京有密陳事件迨至飭令入都並無一事陳奏是以當將伊等治罪今額勒登保復欲效法此二人乎額勒登保當感激朕信用重恩堅持定見設法剿賊如能於年內一鼓殲擒剋期歲事朕必格外施恩從優獎賞若仍前不以國事爲重再行冒瀆必當治以違旨之罪額勒登保好爲勉力慎之毋忽○癸卯邵家壩工合龍加費涇吳璥太子少保○甲辰諭向來挑選秀女皇后皇貴妃妃嬪之親姊妹俱應備挑於體制殊有未協嗣後自嬪以上其親姊妹著加恩不必備挑戶部內務府卽遵照辦理著爲令

○丙午增設福建霞浦縣雲霄同知

十二月甲寅諭倭什布奏馳抵竹山籌剿徐添德股匪並布置卽西邊防情形一摺據稱徐添德一股由平利屬之南坪柳樹垭逃至白沙河等處經倭什布分派將弁竭力剿截賊匪由釘鉅溝竄入已至王家山並探得高三馬五折竄至蘭河口東向等語楚省竹谿竹山一帶係倭什布在彼督率防堵節據該撫奏稱分派兵勇扼要嚴防何以又任徐添德一股竄入楚境可見前此實力防堵之語皆係一派誑言前經加恩將該撫賞給四品頂帶今又任徐添德竄入無能至此實屬大負委任倭什布仍著革去頂帶暫留巡撫之任以觀後效○諭本日額勒登保奏冉學勝張掌櫃樊人傑王四虎王幅賢冉添泗等股賊匪經楊遇春等連日追剿冉學勝等已過江口有出舊縣關之信相距西安藍田不遠又據倭

什布奏徐添德已竄入楚境各等語樊人傑等股賊匪卽係黃白藍綫股內之賊前此由楚竄入川境德楊泰勒保會奏明赴川東一帶截剿乃伊二人並未上緊剿辦任此數股賊匪假道竄陝而德楊泰初一日奏到之摺但稱兜截楊開第陳朝觀李炳等股匪回川黃白藍綫等股竟全不提及顯係將此數股大隊賊眾縱入陝省避難就易藉稱楊開第等需兵剿辦以掩飾其不行入陝之咎德楊泰一等子本應斥革姑念今春在嘉陵江以西剿賊尙爲出力著加恩降爲一等男稍示薄懲勒保前經賞給二品頂帶亦著降爲四品頂帶暫留川督之任以觀後效○撥山東江西藩庫銀各二十萬備湖北軍需○丁巳德楊泰等奏殲首逆楊開第齊國謨命晉德楊泰三等子爵賞勒保三品頂帶○戊午湖南按察使百齡奏密請裁汰有名無實之長夫節省經費得旨承平日久

生齒日繁站夫之設原以閒款養閒人否則又添無數遊手好閒之輩設若盡行裁汰一應差役皆須臨時雇覓人夫扛擡若遇窮鄉僻壤一時難覓多人豈不誤事惟應以實嚴查不准僞指姓名虛申簿籍等弊斯爲正辦况據汝所奏卽行裁汰一省所省僅萬餘金合之天下所省不過十餘萬金而每省又添無營運之人二千餘名合之天下卽有數萬失業之人朕豈靳此十餘萬金忍令數萬人失業乎况前明因裁驛卒流爲大害殷鑒非遙豈可踵其覆轍耶此事斷不可行本應明發此奏治汝之罪因汝前次條奏多有可採是以不卽宣露密諭汝知之十二月初十日鎔下諭尋百齡覆奏感悚下恤批當言則言不當言而言謂之莠言人君擇言行政最爲難事汝係敢言者以此訓汝望汝詳審進言有裨國政勉之○甲戌長齡奏摘勦瓦房口逆匪得旨賞賚提明亮二等

侍衛○是歲朝鮮琉球來貢○會計天下民穀數各省通共大小男婦二萬九千五百二十三萬七千三百一十一名口各省通共存倉米穀二千九百五十七萬五千二百九十六石七斗三升二合一勺

東華續錄

嘉慶十一

臣王先謙敬編

臣周綱蕃恭校

嘉慶六年辛酉春正月辛巳諭御前大臣戶部尙書布彥達賚持躬敬慎奉職恪勤安靜而能有爲精明而不多事在內廷行走小心匪懈堪爲表率委任部旗及步軍統領各事務俱能經理得宜年齒方強正資倚畀上年十二月二十八日因伊偶患時證未經入直卽遣御前侍衛安成帶同御醫前往診視方期調治速痊茲遽聞溘逝深堪悲悼已派伊姪明安齋賜陀羅經被聞信時朕卽欲親往奠醑經軍機大臣面奏本日正值祈穀禮成明日又遇齋戒之期再三懇請是以中止二阿哥係布彥達賚之女壻著於初五日前往代朕奠醑並著二阿哥福晉卽日親往視殮派總管

內務府大臣縉布隨往俟出殯之日仍令福晉至伊家目送並著
加恩晉贈太子太保賞銀三千兩治喪其任內一切處分俱著開
復所有應得卹典該衙門察例具奏尋賜祭葬諡恭勤○壬午調
傅森爲戶部尙書以祿康爲兵部尙書西成爲左都御史調成書
爲工部右侍郎以德文爲盛京戶部侍郎台費蔭爲內閣學士西曲
南燕事○乙酉諭前於乾隆六十年欽奉 恩旨於次年正月

傳位後冊立朕元妃爲皇后經內閣照例撰擬恩詔進呈其時我
皇考日勤訓政一切禮儀詔令自應統於所尊曾蒙 聖諭循
例祭告 天 地 宗廟不必撰擬恩詔停止慶賀表箋並以皇
后壽節暨元旦冬至亦俱停止箋賀禮緣義起朕受寶以後敬謹
遵行嗣於嘉慶二年 先皇后逝世蒙 皇考賜諡孝淑 晉封
朕之貴妃爲皇貴妃 命於孝淑皇后二十七月後舉行冊立皇

后典禮四年四月欽遵 敕旨今 皇后正位中宮而冊立之禮
理宜俟朕釋服後舉行因思立后頒詔乃本朝家法載在會典實
亦古今通義誠以皇后母儀天下佐理化原於冊立之際祭告

天 地

宗廟並頒詔天下以昭慎重

列聖舊章自當恪守著

於本年四月十五日御殿行冊立禮其應頒恩詔著遵例舉行一
切事宜各該衙門查照豫備至於中外臣工慶賀表箋及遇壽節
令節奏上箋賀欽遵 聖訓仍行停止○諭 婉太妃母妃從前

皇考在藩邸時蒙

皇祖所賜侍奉

皇考多年嗣經

晉封

爲妃見在

壽康宮位次居首年躋八十有六康健頤和宜崇位

號以申敬禮應尊封爲

婉貴太妃所有應行事宜著各該衙門

查照定例豫備於四月十五日舉行○童鳳三以疾免○孫藩以

疾免以福慶爲安徽布政使恩長爲安徽按察使

前任和闐辦事大臣○戊

子命清釐嘉慶以前軍餉○辛卯命大理寺少卿窩星額等齎銀
十萬兩赴額勒登保德楞泰軍營頒賚將士○壬辰撥部庫及廣
儲司銀六十萬兩備陝西軍需○丁酉以截剿陝西山陽賊匪功
復德楞泰一等子爵○命截留湖北漕糧六萬七千石有奇賑恤
難民○己亥賜賢良後裔原任刑部尚書魏象樞六世孫煜舉人
○庚子密諭德楞泰知悉見今四川廣元蒼溪一帶賊匪頗多總
欲搶渡嘉陵江雖有李鉉等守禦恐不足恃若令竄至川西必致
稽延時日汝自前年帶兵打仗甚屬奮勇出力去年在四川尤爲
可嘉前因四川之賊漸少是以命汝至陝西剿賊不意汝纔離四
川賊卽接連入蜀目下統計情形四川之賊多於陝西而四川之
百姓亦甚望汝回川汝應趕緊辦完高二一股取道廣元回川先
行顧住嘉陵江岸上緊兜剿能於三月內辦竣朕必立沛殊恩錫

汝封爵勉之勉之先將此硃筆繳進仍將幾時可回川省之處明白覆奏○禁鄉會試卷引用隱僻子書及書寫卦策字體○勒保奏殲斃首逆張世隴等下部議敘○轉錢樾爲吏部左侍郎調曹城爲吏部右侍郎轉劉躍雲爲禮部左侍郎以潘世恩爲禮部右侍郎由內閣學士遷○壬寅命湖南碾米十五萬石備陝西軍糈○癸卯定宗室廕生引見例○甲辰諭盛京爲 帝業所基瞻仰 橋山時殷景慕朕恭承 皇考付託之重禮應恭謁申虔是以前經降旨本年四月釋服後涓吉秋孟恭謁 祖陵用抒積悃近因御史沈琨張鵬展先後陳奏以軍務蕲績非遙須籌善後懇請展期當交王大臣等會同妥議具奏茲據王大臣等請如該御史等所奏暫停前往因思川陝楚三省各路軍營近日屢獲大勝捷音踵至餘匪潰竄無難卽日蕩平但撫綏安輯一切善後機宜亟須籌辦

若前詣盛京程途較遠兼恐遇值雨水文報稍稽又恭查 皇考御極以前未經展謁 祖陵於乾隆八年初次告謁朕昔年在藩邸時曾於乾隆四十八年隨侍 皇考恭謁一次今若展至嘉慶七年舉行斯禮稽之舊典成規爲期尙早一載且本年四月雖屆釋服而秋閒尙 三年以內究不若俟來歲行三周年祭禮後專誠恭謁盛京 祖陵更足以昭誠敬卽著照王大臣等所議於明歲秋冬涓吉前往所有本年各該衙門應豫備之處暫行停止○諭秋獮大典所以肄武習勞從前 皇考巡幸木蘭歲以爲常後因 春秋已高適值連年木蘭雨水較多節經蒙古王公大臣等再四懇請是以數年以來暫停進哨今歲秋閒旣允王大臣等所議緩詣盛京而熱河距京甚近且順時行獮典不可廢朕自應恪守遵行著仍於本年七月十八日由京啓鑾駐蹕避暑山莊中秋

後木蘭行圍所有應行事宜著各該衙門照例豫備至前經降旨於盛京回鑾時由山海關恭詣東陵今盛京已暫停前往距明年新正至裕陵行三周年禮爲期相隔較久朕心實有所不安著於本年木蘭回蹕時由密雲取道前往東陵恭申孺慕○諭軍機大臣等晉昌等奏盛京太廟添設神龕寶座典禮甚隆因地基較窄未敢擅定等語其意在不必添設而未敢明言所見甚是盛京城內本未恭建太廟乾隆四十三年皇考因尊藏

冊寶始行改建亦未供奉

神牌並無祭祀典禮原與太廟

規制不同今莫瞻萊扎郎阿奏請添設神龕寶座一節見據晉

昌等查明限於地基難以安設自無庸輕議更張已將繪到原圖

另行黏籤發往遵照陳設敬將太祖太宗世祖冊寶安奉

中一閒聖祖冊寶安奉東閒世宗冊寶安奉西閒高宗冊

寶安奉東閒西向如中一閒地基較窄未能安奉 三朝冊寶龍

箱卽恭請 太祖 太宗 世祖冊寶三分總貯龍箱庶觀瞻整

肅來歲朕恭謁時仍遵照 皇考行禮處所足申虔敬所有莫瞻

棗等奏請添設之處不必行○德楞奏奏殲斃高二生擒僞先鋒

王儒等得旨獎賚○乙巳勒保奏勦捕黃藍白三號賊匪殲斃首

逆徐萬富等得旨嘉獎賞二品頂帶花翎○轉成書爲工部左侍

郎調和甯爲工部右侍郎以佛爾卿額爲理藩院右侍郎

由內閣學士遷

二月壬子諭軍機大臣會同戶部議駁吉慶奏請另開河工捐例

將見開捐例停止一摺又戶部議駁費滄奏請將捐貢捐銜捐封

三項皆在外報捐一摺所駁俱是已依議行矣見開川楚善後事

例原因勦辦教匪一切善後需用較多暫行開捐係屬一時不得

已之舉原非善政前年本欲卽行停止嗣因各省報捐者人數眾

多業已來京具呈未便阻抑是以仍准續捐至今捐生尙踴躍如前而近來各路軍營捷音踵至川陝楚等省教匪指日即可蕩平朕意方欲俟大功告竣辦理善後略有端緒卽將捐例停止豈有此時復開河工捐例之理况上年南河投效各員所捐之項卽係爲挑濬河身增培隄工而設今該省投效各員捐銀若干尙未奏報又欲另開河工事例似此斤斤言利實屬不知大體至各直省暫開捐監之例本爲各省封貯銀兩節經動撥均須補足原額嗣因粵東江浙等省捐監銀兩較多經部議令湊至成數隨時解京俟軍務完竣補足封貯原額將外省捐監一併停止若又將貢生職銜封典等項均准於各直省一體報捐則京中常捐竟成虛設所有部中經費勢必又由外省報撥徒勞運費該督不過爲外省多積捐項易於通那起見並未詳覈事理通盤籌畫儻伊見任部

臣亦必不爲此奏矣吉慶費瘠等率陳臆見除所奏不准外仍各行申飭嗣後內外大小臣工不得妄行條奏開言利之端如再有以此等事瀆陳者卽當治以應得之罪○乙卯勒保奏擊勦碑灣寺等處賊匪射死首逆王士虎得旨嘉獎○丙辰湖廣總督書麟等奏長齡會同明亮殲斃僞總兵卜興昂等得旨嘉獎下部議敘

○戊午以繼善爲盛京禮部侍郎

由左副都御史遷

○賜賢良後裔原任

禮部尙書楊名時曾孫景曾江蘇巡撫徐士林孫從旭舉人○己未諭本年京察屆期吏部開列在京各部院大臣及各省督撫名單進呈請旨甄別大學士向不開列第念大學士公保甯前年晉擢綸扉本應入閣辦事因其經理新疆諸務諳熟一時更換乏人是以未令來京伊久任伊犁將軍鎮靜安詳藩部同深悅服慶桂董誥在軍機處行走承旨書諭恪勤匪懈俱著交部議敘王杰劉

肅謹慎稱職亦著一體交部議敘尙書彭元瑞恭辦 高宗純皇

帝實錄盡心編纂侍郎戴衢亨在軍機處行走勤慎稱職倉場侍

郎達慶鄒炳泰剔除積弊整頓漕務均著交部議敘協辦大學士

總督書麟前在雲貴總督任內辦理猓黑安速歲功茲調任湖廣

督兵勦截竄匪一切正資整飭總督吉慶久任封圻操守廉潔督

捕洋盜甚屬認真吳璥熟悉河務上年調任南河卽能將邵家壩

漫口堵合鐵保總司漕務肅清諸弊巡撫岳起潔已率屬卓著廉

名吳熊光辦理防堵事宜最爲認真上年勦捕寶和教匪安速完

竣俱著交部議敘餘俱照舊供職○王戌以玉麟戴聯奎俱爲內

閣學士俱由角事選○乙丑 上啓鑒謁 東陵○免經過地方額賦

十分之三○賑湖北教匪滋擾之竹谿等四縣難民○丙寅免四

川教匪滋擾之達州等三十五廳州縣及南坪營額賦緩徵南充

等七州縣額賦石砮等十一州縣新舊額賦○戊辰 上謁 昭

西陵 孝陵 孝東陵 景陵 裕陵○己巳清明節 上謁

裕陵行敷土禮回鑾○以恩普為左副都御史抽大經○庚午改

原駐辰州之湖廣提督為湖南提督增設湖北提督駐襄陽改原

駐穀城之襄陽鎮總兵官為鄖陽鎮總兵官駐鄖陽原駐鄖陽之

副將移駐竹山改為竹山協副將○辛未廣厚以疾免以王文湧

為甘肅布政使朱紹曾為山西按察使由直隸屬○壬申 上還

京師○諭軍機大臣等近聞額勒登保因南山餘匪未淨親自帶

兵搜捕伊係經略大臣未便因零星餘匪牽綴見據長麟奏高馬

後股賊匪已偪過川境德楞泰奏龍紹周等迭因官兵勦急狂奔

亦近川楚交界額勒登保應即移師漢南若德楞泰追賊入川額

勒登保即馳赴楚界會剿以收夾擊之效○癸酉定守護 陵寢

王貝勒貝子公三年更代例○准烏里雅蘇台塔爾巴哈台幫辦
領隊大臣專摺奏事○傅森卒調成德爲戶部尙書軍機處行走
祿康爲刑部尙書以豐紳濟倫爲兵部尙書由戶部左○乙亥額
勒登保奏生擒首逆王廷詔得旨獎賚與提督楊遇春均下部議
敘

三月戊寅諭朕綜理庶政無不率由舊章從前 皇考高宗純皇
帝每次挑選八旗秀女時俱由派出王等查明 聖祖仁皇帝派
衍二十四近支宗室之名呈遞以便指配今朕挑選秀女自應遵
照此例於 世宗憲皇帝派衍近支宗室內按其世系指配著交
派出王等嗣後應行呈遞宗室等名惟將 世宗憲皇帝派衍近
支宗室之名繕寫綠頭牌照例呈進備將選出秀女酌量指配永
著爲例○己卯命嗣後挑選八旗秀女公主之女停止挑選 上

以從前公主多下嫁蒙古王之子下嫁八旗者甚少是以挑選八旗秀女並未另立章程故有是命○申嚴匿名文書坐罪例○庚辰諭邪教滋事實爲王法所不容惟念附賊匪徒非盡甘心叛逆皆因被賊裹脅節經降旨凡投出者悉貸其死如能縛獻賊渠並賞給官職銀兩此朕仰體上天好生之德惟思少殺一賊卽多留一民各路領兵大臣及督撫等將此旨宣示俾咸知悔悟相率來投更可迅速戡功奠安黎庶○癸未初彭齡以親老請改京職允之調伊桑阿爲雲南巡撫以孫曰秉爲貴州巡撫同興爲江甯布政使調福瞻爲直隸按察使以喬人傑爲福建按察使由直隸道轉○甲申保甯請開採塔爾巴哈台金礦上不許仍嚴飭之○乙酉諭給事中馬履泰奏請除外省官員上衙門俗例以歸覈實一摺甚屬無謂外省官員承辦公事有須稟請上司斟酌施行者

原應親謁見督撫面爲指示方能辦理妥協從前督撫中如福康安李侍堯等往往性耽安逸俾畫作夜在署酣飲演劇不能夙興接見屬員商辦事務以致吏治廢弛實衆所共知共聞者今馬履泰乃以外省督撫每日卯辰接見司道文武職官挨次傳見俱爲無謂之應酬豈各省督撫安坐衙署者不至誤公而勤見屬員者轉致廢事乎至稱上司接見屬員時列坐閒談所言亦非盡公事該給事中並未目擊各省督撫接見屬員如何談論又何所見而云然且外省官員司道以下均須督撫考察而府州縣等官則司道亦應考察若上司竟不接見屬員何以知其賢否况該給事中稱屬員謁見上司已午方散往往秉燭莅事等語屬員等於已午旣散之後正可各在本署辦公何至事有貽誤若秉燭泊官文書有何不可豈得與卜夜沈湎者比卽如朕每日清晨召見大臣等

面詢一切隨時指示實爲勤政良法若如馬履泰所言各部院大等止應在衙門辦事槩無庸入直待召有是理乎馬履泰妄逞臆見所奏實爲紕繆著傳旨嚴行申飭原摺擲還○丙戌申禁步軍統領左右翼總兵官私役步甲○陳文緯緣事降調以張師誠爲

山西布政使調阿林保爲江蘇按察使以示慧爲江西按察使

東陽通使遷

○庚寅諭向來各省情實人犯秋審後仍歸州縣監禁奉

到部文卽在本處地方辦理嗣因廣東省嘉應州處決斬犯該州等並不親往法場監視以致行刑時未將該犯斬首竟被逃匿一案恐此等重囚卽在本州處決不足以昭慎重將各州縣情實各犯俱在臬司等衙門監禁聽候部文辦理嗣又因省城監禁情實人犯過多山東省司監卽有越獄之案前年經胡季堂面奏特交軍機大臣會同刑部議覆仍將各省秋審人犯照舊例發回各州

縣監禁屆期分別處決地方官承辦事件孰有大於此者乃本日刑部具奏河南省竟有將絞犯袁記誤行處斬之事此案據吳熊光咨稱該縣楊繩武接奉部文卽豫備絞椿棍索插明標記移會把總等將袁記綁赴法場以兵役均不識字誤行處斬該縣與把總喝阻不及等語情節多有支離此次秋審句決若鎮平縣監內斬絞之犯或有數名臨時行刑錯誤尙屬情理所有今該縣秋決重囚止有袁記一名且袁記係屬絞犯一經接到部文兵役等卽不應攜刀前赴法場何至臨時錯誤至所稱豫備絞椿棍索及喝阻無及之語顯係飾詞搪塞看來該縣並未親往僅移交把總監視而把總又委之兵役其中兵役等或竟懷挾宿嫌故行殘害亦未可定該縣等於處決罪囚漫不經心其輕視人命已可槩見卽應專摺嚴參乃代理臬司彭如幹率據該縣等一面之詞轉詳巡

撫而吳熊光亦並不詳覈情節將該把總等各職名歸入年終決
囚彙題案內開參咨部完結殊屬含混吳熊光彭如幹俱著傳旨
嚴行申飭並著交部議處鎮平縣知縣楊繩武把總安貴俱著革
職拏問見在吳熊光帶兵在邊界巡防著先福提同案內人證兵
役等詳細嚴究務得確情按例定擬具奏該藩司南經到任自無
所用其迴護也○辛卯長麟奏勦滅汧陽新起賊匪得旨嘉獎○
壬辰德楞泰奏生擒賊目趙志成等得旨嘉獎○癸巳諭大挑舉
人原爲疏通寒畯俾免淹滯挑選時並不試以文藝止就其人年
貌分別去取立法遵行已久亦斷無復行考試之理而希榮干進
者流妄生冀倖賄屬情求均所不免並聞從前大挑有豫先私許
銀數封貯於挑得後憑票交兌者士論沸騰去取未能允協嗣經
劉權之條奏 皇考因特派皇子與大臣等公同揀選朕與成親

王於乾隆五十二年六十年會兩與其事溯自乾隆三十八年癸巳已蒙 皇考密緘朕名纘承大寶而丁未乙卯兩次大挑俱蒙 皇考簡派仰見 聖心於此一事委任至爲慎重乃彼時卽有人將與挑舉子託言私宅賓友竟敢在朕前呈遞名條者朕與成親王密記所託姓名屏而不錄今其人尙在朝列亦不必明言使彼內愧於心耳試思內廷皇子尙有人敢於請託况王大臣乎此次大挑經朕派出王大臣等諒不敢爲受賄營私之事而徇情聽屬實不能保其必無卽有謹飭自愛者而爲拒絕亦未必肯將屬託名條遽行陳奏但此等夤緣舞弊之徒若不嚴辦一二不足示儆今特明頒諭旨如尙有向派出之王大臣暗遞名條請託者卽著密封進呈朕必將屬託之人分別懲治王大臣給予甄敘儻有心隱匿存息事之淺見經朕訪聞或別經發覺定將王大臣一併

治罪決不寬貸至王大臣派出後理應慎密關防從前朕蒙簡
派挑選後卽同成親王在上書房住宿並恐伺候太監多係直隸
籍貫與該省舉子或有認識往來因豫爲防檢不令跟隨止帶詣
達等二三人今派出王大臣等卽著在紫禁城內住宿自擇謹慎
家丁跟隨至多不得過三人勿離左右毋許逐日更換致滋物議
其如何按照班次秉公挑選之處前降諭旨甚明著王大臣等遵
照妥辦以副朕剔弊遴才至意○乙未書麟等奏孫清元等槍傷
首逆苟文明並戮擒賊匪多名得旨嘉獎下部議敘○丁酉賜賢
良後裔原任工部尙書湯斌四世孫生員念曾舉人廣西巡撫傅
宏烈六世孫縣丞徵璫知縣○己亥諭入春以來雨暘時若畿輔
麥苗暢發見值謁陵釋服之期凡驛路所經先令大臣等管護
民田毋許隨從人等踐踏禾苗以副朕保護民食至意○諭江西

甯州地方於嘉慶三年秋間有逆匪劉聯登等滋事卽時撲滅一案朕聞彼時官兵未到之前該州士民各自保護村莊同心抵禦以故賊匪不至蔓延立就擒獲該撫雖經量加獎賞並未奏明辦理會諭令張誠基查明在事出力者據實具奏候朕加恩茲據奏民人李君弼等五名或槍斃首逆或拏獲賊匪武生梁韜等十名或把守緊要隘口或協同官兵殲賊均係最爲出力之人開單進呈民人李君弼著賞給把總職銜溫逢堯徐植三陳秀鳳詹茂林俱著賞給外委職銜並詢明如願入伍卽令其隨營差操遇缺補用武生梁韜著賞給把總頂帶監生梁岐周泮張應璧著賞給從九品頂帶民人周海澂周安國張茂堂吳耀賓吳豫源陳文選俱著賞給外委頂帶以示獎勵該州士民等敵愾同仇知方向義州治保護無虞著將甯州改爲義甯州俾該處紳民顧名思義益勉

敦龐用副朕嘉惠善良至意○辛丑 上啓鑾謁 裕陵○免經

過地方額賦十分之三○癸卯諭軍機大臣等尹壯圖密奏請留
巡撫初彭齡一摺據稱初彭齡莅任一年有餘清介率屬實惠在
民能假以歲月則滇省元氣可復若驟易生手則拊循未幾卽恩
恩去任殊失赤子之望等語大屬非是督撫久任方能有成朕與
廷臣時常論及况初彭齡自擢任滇撫以來於地方務實力整
頓朕所深知前此奏懇解任養親朕本欲令其仍留滇任隨傳訊
伊弟初喬齡據稱伊父母年逾七十衰病屬實因念初彭齡身任
封圻遠在萬里之外聞父母在京多病心懸兩地恐致貽誤公事
陳請歸養亦屬人子真情朕方以孝治天下自難不允所請是以
前降諭旨准其改補京職今尹壯圖以滇省民情愛戴欲留初彭
齡在滇弗令歸養試思尹壯圖亦因母老回籍侍養之人獨不念

初彭齡雙親俱已年邁而轉拂其孝養之忱乎己所不欲勿施於人若初彭齡可以留滇則尹壯圖亦當來京供職矣在初彭齡既經具摺請養斷無授意尹壯圖令其奏留博此虛譽而尹壯圖以在籍紳宦竟敢越分干與本省大吏去留若各省紳士相率效尤紛紛保留成何政體豈不蹈明季惡習乎又另摺奏滿洲子弟宜於十五六歲以前專責以熟讀經書講明理義俟心性融澈精力完固再責以騎射繙譯更易爲力等語尤屬紕繆本朝家法以國語騎射爲重從前定鼎之初滿洲人材並未嫻習漢文不能漢語而建功立績勲業昭然此時設尙有其人區區教匪早已殄除是今日滿洲風氣實不如從前之務勤本業而尹壯圖乃以繙譯一道必先通曉漢文易於明透伊並不知清文義理爲此贅論况滿洲國語本應不學而能而騎射亦須童年練習若如尹壯圖所言

必俟十五六歲以後始行學習安能精熟朕方諄諄以國語騎射
爲滿洲根本屢經訓飭尙恐未能盡副朕望今欲使滿洲子弟於
十五六歲以前專習漢文豈不更將本業荒廢耶朕前此加恩賞
給尹壯圖給事中銜令其在籍奏事原爲該省地方官吏或有廢
弛貪黷之事督撫隱匿不奏伊得隨時具摺密陳乃尹壯圖竟欲
干涉朕用人大權並將從前具奏滿洲讀書應試曾經駁飭之事
復行瀆奏更張本朝成法本應治以妄言之罪但朕正當求言之
際不肯以言罪人著伊桑阿將原摺擲還尹壯圖並著傳旨嚴行
申飭此後遇有地方不公不法事件仍准其具摺密陳若再似此
謬陳臆說之論必當治以妄言之罪不能再爲寬宥也○甲辰

上謁 昭西陵

孝陵

孝東陵

景陵

裕陵○諭去歲福長

安僅生瘡癰卽託故並未詣

陵當差今復敢以痲疾呈請回京

醫治實屬膽大上則 皇考陵寢所在下則伊父墳墓亦在左近
福長安若稍有天良何忍輕離竟欲回京耶無 君無父殊爲可
惡縣億弘謙成林並未斥駁率行據呈具奏亦屬大謬成林前在
軍機章京上行走時福長安方任軍機大臣今福長安雖經獲罪
不免心存見好是以有此瀆奏尤屬卑鄙無恥福長安著卽革職
發往盛京作爲披甲交晉昌嚴行管束數年後再觀後效福長安
之子錫麟亦著隨往盛京卽以該處防禦補用縣億弘謙成林俱
著交該衙門嚴加議處外縣億著革去都統及管圍大臣隨同王
公等照例上朝正藍旗蒙古都統員缺著弘融補授管圍大臣員
缺著額勒登保補授成林著拔去花翎革退內務府大臣馬蘭鎮
總兵補授盛京副都統卽著於本日押帶福長安起程福長安在
途如有他故惟成林是問成林所遣內務府大臣兼馬蘭鎮總兵

員缺著與長補授與長所遺正紅旗漢軍副都統員缺著慶溥調補三姓副都統員缺著額勒亨額調補永碩到陵時福長安業經具呈永碩並未阻止亦隨同列銜具奏永碩著交宗人府議處○乙巳上謁裕陵行釋服禮回鑾○免陝西教匪滋擾之商州通稅

夏四月丁未朔上還京師○諭朕由黃木廠尖營啓行忽見一人騎馬奔馳訊係隨從莊親王縣課之人著交刑部照衝突儀仗例治罪縣課係領侍衛內大臣查管御道乃其分內之事今尙不能約束家人豈可仍居要任縣課著不必在內廷行走革去領侍衛內大臣都統閼兵大臣並花翎黃馬褂加恩留其王爵仍交宗人府嚴加議處從前皇考每次巡幸朕在藩邸時隨行止帶諸達一人哈哈珠色一人乃各王公大臣御前侍衛等競尙虛文先

令多人前至宮門外擁擠伺候實爲惡習著通諭諸王大臣等務訓飭家人凡御路及宮門左近處所不許任意行走如傳諭後儻有復蹈故轍者除將該跟役照例治罪外仍將該家主一併治罪

○戊申停圓明園軍機處值日之科道官○撥廣東兩淮鹽課銀七十萬兩分備陝西湖北軍需○以裘行簡爲河南布政使由太僕寺

○庚戌 上幸圓明園○壬子諭禮部奏琉球國使臣呈稱該國此次恭進謝恩方物懇予賞收免抵下次正貢該國王因特賜御書扁額等件專遣使臣呈進謝恩方物曾經該部具奏降旨准作下次正貢原以昭體恤而示懷柔今據該使臣呈稱伊等臨行時國王再三諄屬懇請准予賞收免抵下次正貢具見該國王抒忱效悃誠懇可嘉著照所請此次所進方物准予賞收下次正貢屆期該國王遣使來京時再當優加賞賚用昭柔惠遠藩至意該

部卽傳諭該使臣令於回國時轉告該國王知之○甲寅承恩侯恭阿拉父恭保故照公爵例賜卹諡恪慎○乙卯諭本年大挑各省舉人聞有廣東舉人顏樾業經王大臣公同挑一等後因張若溍稱係直隸布政使顏檢之弟王大臣等有意避嫌當卽扣除朕欲俟會試揭曉後另行加恩今榜發未經中式顏檢平日居官公慎伊等本挑取一等未便因顏檢係屬大員轉行扣除顏樾著加恩仍作爲一等照例掣籤分發試用○賜故大學士蔡新孫舉人行達進士○戊午賜賢良後裔原任大學士李光地元孫維翰舉人○己未以四川民人輸貲急公免遂甯等八十六廳州縣明年額賦○額勒登保等奏生擒首逆高三馬五及馬五之子餘黨悉平○辛酉 上御太和殿冊立 皇貴妃鈕祜祿氏爲 皇后頒詔天下覃恩有差○晉封瑩嬪侯佳氏爲 華妃溍貴人董佳氏

爲 追嬪春貴人王佳氏爲 吉嬪○尊封 高宗純皇帝婉妃
陳佳氏爲 婉貴太妃○禁羣臣捐養廉銀辦公○書麟有疾命
來京補授吏部尙書以倭什布爲湖廣總督仍戴三品翎頂全保
爲湖北巡撫○命那彥成交軍機處以副都統記名○王戍諭書
麟奏稱患病懇請至軍營後路調理當降旨令其回京供職其湖
廣總督員缺緊要因念倭什布辦理軍務非其所長而於湖北地
方情形自應諳悉是以將伊補授仍令戴用三品翎頂以觀後效
茲據德楞奏年來湖北辦理糧餉總不能隨時接濟以致軍行
乏食賊匪不能剋期剿竣實由於此此次德楞奏追勦徐添德糧
餉不繼賴書麟捐給銀兩俾兵丁沿途購買得以無誤其長齡明
亮孫清元各路軍糧亦皆不能接濟並據奏前歲德楞泰在湖北
勦賊時兵丁行走四十五日僅得五日之糧等語倭什布本由湖

廣總督降補湖北巡撫皆伊任內之事。去年因該省辦理軍務總未奏請撥餉，經朕降旨查詢。遂不待伊等奏請，節次撥發餉項計本年兩次所發已有六十萬兩。何至不能接濟軍食？前此伊等不奏請撥餉之故，不過欲圖見好，殊不思糧餉不繼，軍務一日不完，則軍需一日不減，所費更大。且勦賊本以安民，朕從不於帑金稍有吝惜。卽近日川陝兩省餉銀亦皆不待奏請先行撥發。朕豫籌軍食時刻，縈懷豈忍令兵丁等效命戎行，枵腹從事？乃楚省數年以來積玩因循，並不視爲要務。自書麟到後，雖極力整頓，尙不能隨時接濟。倭什布在楚省督撫兩任時日最久，其玩誤之咎實無可辭。有忝封疆重寄，豈可復邀升擢？倭什布卽著解任來京候旨。所有湖廣總督員缺著吳熊光補授，卽馳驛前赴新任。其河南巡撫員缺著顏檢補授，亦著馳驛速赴新任，以便吳熊光交卸赴楚。

○協辦大學士吏部尙書書麟卒晉贈太子太傅賞一等男爵遣
乾清門侍衛孟住奠茶酒予祭葬諡文勤○命長齡暫署湖廣總
督侯吳熊光到任後仍赴軍營帶兵○德楞泰奏勦辦紅花埭等
處賊匪斃賊首張允壽得旨獎賚賞還雙眼花翎○調同興爲直
隸布政使裘行簡爲江甯布政使以完顏岱爲河南布政使陳鍾
琛爲河南按察使由南汝光道遷○以吳俊爲山東布政使陳文爲廣東
按察使由湖南岳常道遷○甲子諭軍機大臣等前據伊桑阿奏報貴州
銅仁等處苗匪滋事當經降旨令琅玕迅速前往督辦琅玕上年
在貴州巡撫任內辦理苗匪甚爲妥速是以加恩擢任總督茲復
令其赴黔督辦於該省苗情較伊桑阿自爲熟習而常明曾經勦
辦苗寨亦係熟手諒可迅速歲事見在初彭齡已准令來京供職
滇省需人彈壓伊桑阿竟當遵照昨旨卽往雲南接印任事不必

與琅玕一同在黔辦理將此傳諭琅玕並伊桑阿知之○丙寅以生擒高二馬五王廷詔各功晉額勒登保二等子爵賞雙眼花翎提督楊遇春騎都尉世職○貴州巡撫伊桑阿奏攻勦石硯苗匪擒獲黔楚各要犯得旨獎賚賞還常明二品頂帶花翎○戊辰以吉慶協辦大學士仍留兩廣總督任○調琳甯爲吏部尙書以組布爲工部尙書轉那彥寶爲兵部左侍郎調成書爲兵部右侍郎轉和甯爲工部左侍郎以蘇楞額爲工部右侍郎由副都統遷○己巳諭軍機大臣等勒保奏於途次探明川北已無賊氛移師督辦川東竄匪摺內全係浮詞並未遇賊接仗且陝省高三馬五早經辦竣今始據奏及楚省之張允壽業經德楞泰奏報擊斃而勒保尙未之知伊在川帶兵時稱馳往川北時稱移師川東非止一次東奔西逐不特師老力疲抑且虛糜餉項似此任意遲延顯係有心

觀望看來勒保總欲因人成事所稱趕赴川東合力勦辦湯劉股賊等語並非有認真勦賊情事不過因德楞泰在楚勦辦徐添德距川境不遠德楞泰一經到川卽可聯銜奏事藉以邀功見在湯思蛟與劉朝選等股屯踞乾溪溝前已有旨專交勒保勦辦勒保並未乘機勦殺且七十五一路兵力昨已據額勒登保奏追勦陳朝觀一股入陝今勒保尙稱知會七十五由太平就近追勦湯劉等逆是川省帶兵大員業已追賊出境勒保尙不知信息猶望其確探賊蹤奮勉勦捕耶至樊人傑一股在川日久不知去向勒保節次摺內總未提及豈竟任潛匿置之不辦目下麥已成熟賊竄出又得掠食飽屢勢必裹脅多人復成大股又將荼毒無數生靈何時始能戡事乎勒保曾獲重愆經朕格外加恩棄瑕錄用仍任四川總督已給與二品翎頂乃帶兵勦賊不知力圖報效勉

贖前愆一味遲滯本應革職拏問姑念該省總督大員屢行更換
又難另易生手勒保著從寬革去頂翎暫留四川總督之任以觀
後效○辛未諭軍機大臣等琅玕等奏籌辦銅仁苗匪滋事案內
善後邊防事宜摺內有身任總督不能先事豫防早到辦理實屬
惶愧之至等語此次銅仁苗匪在松桃一帶滋事琅玕遠在滇省
接到黔省稟報卽迅速前往而未到之先業經伊桑阿督同常明
將黔省苗匪首夥各要犯全獲辦理迅速深慰朕懷封疆大吏遇
地方有事止期早臻甯謐不必功自己出琅玕何惶愧之有至所
稱從前湖南辦理善後多設礮卡兵勇而黔省未曾辦及以致復
有句結焚搶此皆係勒保鄂輝任內之事或係伊等未能籌及抑
係該處山險路僻限於地勢無從設卡守禦見在琅玕親駐該處
務當悉心審度應如何分派兵勇在邊防守爲一勞永逸之計卽

酌量妥辦不可稍存惜費之見儻經理未妥日後苗畝或再滋事仍須調兵投捕是欲節省而轉多糜費也琅玕俟辦理善後完竣再行回駐雲南伊桑阿仍遵前旨俟孫曰秉到任後卽赴滇撫新任○賜顧臯等二百七十五人進士及第出身有差

五月丁丑諭軍機大臣等張誠基奏查明通省倉庫實數咨部分別追補一摺所奏大謬無此辦法各省錢糧倉庫原應存貯充實不得絲毫短少設稍有虧缺該督撫本當據實參辦至於彌補二字原不可直達朕前豈可公然咨部辦理近年因直隸係畿輔近地差務殷繁各州縣展轉那墊以致倉庫虧短事非一時官非一任特降旨將虧空各員姑免治罪分別虧項多寡予限著追此乃格外施恩會明降諭旨他省不得援以爲例今張誠基竟欲倣照此案咨部辦理巧爲嘗試朕思江西地方安靜年歲屢豐並未有

需費浩繁之處何以自乾隆四十一年至嘉慶四年各州縣虧空銀數至八十三萬餘兩之多張誠基身任江西巡撫已閱多年盤查倉庫無虧俱有奏案可據今乃虧短如許之多安知非該撫任內各州縣任意虧缺歸咎前人作爲歷任虧項思以罰不及眾爲屬員開脫而摺內尙云不敢以咨部爲自占地步之計其誰欺乎張誠基著傳旨嚴行申飭各省虧空朕所以不卽嚴辦者原以各該督撫自顧考成明知所屬倉庫短缺斷無不止緊籌辦之理果能不動聲色全數補完何必因此輒興大獄乃各督撫等竟似一經奏明卽有恃無恐置身事外上年荆道乾岳起皆曾以倉庫虧短咨部經部臣具奏當經降旨嚴飭張誠基豈未之聞乎今竟敢一面奏聞一面咨部豈以如此辦理伊卽能倖免罪戾耶該撫如果欲明辦虧空應卽徹底清查將因何虧空從前何以不行參奏

緣由和盤托出據實陳奏朕不難將該省大小官吏一併嚴辦以
儆其餘惟在督撫自行酌量耳儻或藉彌補爲名侵害閭閻擾累
地方致生事端亦必先將該撫治罪再將不肖地方官一體嚴辦
勿謂誥誡之不豫也懍之慎之張誠基原摺著擲還其咨部之案
亦著部臣速行駁回且看該撫如何辦理再降諭旨○戊寅諭勒
保奏分兵入山將湯思蛟等股轟出老林打仗得勝一摺雖斬獲
共有一千三百餘人未足爲功惟永甯帶兵搶上山梁較爲出力
著交部議敘以示獎勵勒保甫經獲咎革去翎頂辦理湯逆等股
究屬遲延尙不應給予議敘總俟將湯逆等股全數掃除肅清川
境朕不但給還翎頂並當優加懋賞若再不能上緊剿辦非惟不
能邀恩必當重治其罪○己卯賜賢良後裔故大學士王熙曾孫
元洪舉人○癸未諭前因德楞泰奏年來湖北辦理糧餉不能隨

時接濟軍行乏食是以賊未克期勦竣近日德楞泰追勦徐添德糧餉不繼僅賴書麟捐給銀兩俾兵丁沿途購買卽長齡明亮孫清元各路軍糧亦皆不能接濟當卽明降諭旨以倭什布本由湖廣總督降補湖北巡撫皆伊任內之事乃積玩因循其罪實無可辭因令解任來京候旨本日倭什布奏到之摺力爲申辨正在降旨查辦適額勒登保奏到密陳湖北情形一摺據稱久聞湖北辦理糧餉甚不妥協因屬德楞泰於赴楚時留心查訪見據伊來札內稱楚省所派防堵官兵竟不給發糧餉以致官兵有勒索之事而鄉勇等係每月給銀三兩不給糧食近則數月以來並銀兩亦未給發甚至擾累居民等語殊堪駭異各省派調兵勇原以勦賊安良數年以來糜帑至數千萬何嘗稍有吝惜昨年因楚省軍營久未奏請撥餉經朕降旨查詢並不待伊等奏請節次撥發餉銀

計自上年至今所發銀數已及一百七十餘萬兩並撥鄰省米石何至不能接濟軍食此必承辦之員任意侵扣私肥囊橐竟忍令兵勇枵腹從事累及閭閻是國家派撥兵勇未能安民先已病民不料該省大小官員喪心昧良一至於此俟什布在楚有年種種紕繆著卽革職拏問交軍機大臣會同刑部嚴審治罪計倭什布已將行抵河南著交顏檢傳旨將伊鎖解來京派委誠妥大員小心解送毋令稍有疏虞○緩徵湖北教匪滋擾之竹谿等五十九州縣屯衛額賦○甲申 上詣 文昌廟行禮命春秋致祭載入祀典○乙酉予陝西陣亡四川總兵官朱射斗祭葬世職如提督例謚勇烈○丙戌命各省總兵官輪班入覲○辛卯以奉天府丞兼學政定三年更換例○壬辰 上詣靜明園 龍神廟祈雨○癸巳雨○乙未諭玉泉山 惠濟慈佑龍王廟每遇祈禱雨澤屢

著靈應久經載入祀典近因夏至以後雨澤較少本月十七日朕親詣虔誠默禱是日卽有微雨飄灑次日大霑甘霖連宵達曙尤徵靈驗允宜敬加稱號用答 神庥著稱爲 惠濟慈佑靈護龍王廟以昭崇奉○癸卯諭前因滿漢文職各衙門堂官圖明圖向無公寓特賞給弘雅園屋宇作爲各該堂官等公所因思圖名係聖祖仁皇帝御題是以彼時弘字未經缺筆今旣賞作公寓自應敬避著將原奉 御書扁額繳進恭瞻後交 壽皇殿敬謹尊藏朕書集賢院扁額頒給懸挂以昭恩賚○乙巳諭吳熊光奏查出湖北辦理糧餉種種貽誤情形一摺姜晟前任湖廣總督軍火糧餉是其專責伊在楚雖不及倭什布之久但駐紮襄陽於支發銀兩分設多局並不早立章程見經吳熊光查出該局止有發銀數目並無用銀實數而於兵勇應領之項挂欠不發其所發餉銀

用於何處顯係該糧員等意存蒙混豫爲侵冒地步該督在彼所辦何事除俟全案審訊明確再降諭旨外妻晟著先行交部嚴加議處○以湖北宜昌鎮總兵官明亮年老命回京爲二等侍衛○烏爾圖納遜以疾免以額勒登保爲理藩院尙書

六月己酉以京師大雨命濬溝渠河道○壬子永定河溢命內閣學士台費蔭等分勘水災○癸丑諭朕德薄任重夙夜憂勤深懼弗克負荷陝蜀邪教倡亂民遭荼毒近日連擒首逆意謂今秋或可蕺事卽此一念稍涉自滿致干天和自六月朔日大雨五晝夜宮門水深數尺桑乾河決漫口四處京城西南隅幾成澤國村落蕩然聞者痛心見者慘目小民何辜皆予之罪也分命卿員實力稽查盡心撫恤救我餘黎因思今秋往木蘭行圍除道成梁皆需民力予心不忍意今秋停止巡幸庶息民勞而省己過爾諸臣

速議以聞尋奏應卽欽遵諭旨今秋停止巡幸以紓民力而迓天和從之○德楞泰等奏追勦青號賊匪淹斃首逆徐添德得旨獎賚下部議敘○甲寅諭姜晟在湖廣總督任內辦理軍需各務種種貽誤前據吳熊光查奏當卽降旨將姜晟交部嚴加議處部議上時必當治以溺職之罪今京城自六月朔日起大雨五日四夜水勢驟長節經朕派令乾清門侍衛等馳赴城外查勘被水情形旋據覆奏永定河兩岸決口四處盧溝橋一帶幾成澤國並經設法將各路軍報齎送此皆朕與廷臣集議辦理又分眾卿員四路查災辦賑眾臣均能奔走不辭勞瘁而自初一至初八日地方大吏杳無音信殊出情理之外保定距京甚近值此大雨盛漲卽鄰近地方百姓尙應隨處留心體察豈有京師帝居所在爲臣子者漠不關心視同膜外有如此之封疆大吏乎若云被水阻隔則朕

近日派往之大員侍衛等尙能策馬淌渡接遞軍報姜晟卽不親自前來獨不當差人齋摺自陳悚懼不安之意耶卽本日姜晟奏到一摺止據河道稟報內稱本年永定河河流未斷汛前節次長水實爲嘉兆又稱大雨疊沛查明田禾尙無妨礙真如在夢中矣向來永定河至伏汛時該督豫行赴工防汛上年河水未經泛漲胡季堂尙往來工次冒雨觸熱以致積勞成疾乃姜晟摺內猶稱一面豫備如應赴工卽起程前往督防可謂全無人心畿輔距京咫尺地方大員已玩愒乃爾若遠省督撫相率效尤豈復尙成政體姜晟之在直隸如此其在湖北辦理軍需廢弛玩誤不必言矣近因雨水過多朕遇災增懼不肯遷怒節次降旨引爲己過卽宮廷內太監偶有過失方且曲意優容豈肯於封疆大吏有意苛求以塞災應但姜晟孤恩尸位昏愎督亂伊若出之有意卽屬喪盡

天良若云全無聞見則是形同木偶此而不加懲辦何以整飭官
聯經朕詢問本日奏事之王大臣等僉以姜晟罪由自取必當革
職拏問若復加曲貸轉非執法持平之道姜晟著革職派侍郎熊
枚馳驛帶同司員前往傳旨拏問卽暫行接署直隸總督篆務派
委妥員將姜晟押解來京交軍機大臣會同刑部嚴審具奏至永
定河道王念孫及南北岸同知於河務是其專責今該處已有四
處決口王念孫全未知覺猶以虛詞具稟姜晟且那彥寶赴河干
查察水宿一夜總未見該道等在彼勘辦均屬罪無可追王念孫
及南岸同知翟萼雲北岸同知陳煜著那彥寶莫瞻棻於沿途遇
見時傳旨將伊三人革職拏問一併解京歸案審辦至石景山同
知亦係管理河務之員但見在決口處所是否該員所管工段著
熊枚查明具奏再降諭旨○撥局錢二千緡撫恤永定右安門外

災民○命戶部左侍郎高杞武備院卿巴甯阿堵築永定河決口
兵部右侍郎那彥寶工部右侍郎莫瞻菴分赴下游查勘○免順
天府大興宛平兩縣額賦○乙卯晴遣官祭龍神廟○起丁憂
在籍巡撫陳大文署直隸總督○賑永定門外飢民○命順天府
尹率屬收葬掩斃災民○丙辰復雨○命刑部清理庶獄○丁巳
額勒登保等奏督勦冉逆等股匪並生擒首逆張添倫得旨獎賚
○壬戌截留漕米六十萬石貯天津備賑○癸亥撥廣儲司銀二
千兩賑永定右安門外災民○額勒登保奏生擒首逆伍懷志餘
匪肅清得旨獎賚○甲子增定祈晴典禮○撥大興宛平二縣常
平倉穀備賑○免順天府宛平縣明年額賦涿州等十州縣額賦
懷柔等三州縣額賦十分之五○命五城照冬月例煮賑一月○
撥直隸藩庫銀十萬兩撫恤寧州等處災民○乙丑以水災改順

天鄉試展期一月○丙寅諭軍機大臣等黔苗茲事一案前因伊桑阿奏稱親往石硯攻克苗寨擒獲首逆多人苗匪俱皆畏罪懾伏業經辦竣當將伊桑阿等分別獎敘而琅玕到彼又復集兵進剿迹涉邀功恐致別生事端是以降旨訓飭乃近日朕聞伊桑阿僅在銅仁駐紮並未親至石硯軍營聞知琅玕起身前來不能阻止卽將常明等攻克石硯作爲親身前往裝點入奏琅玕由鎮遠赴銅仁途次難民紛紛擁道哭訴琅玕復行帶兵進剿是伊桑阿前次所奏竟係粉飾虛詞琅玕身爲總督於難民擁道哭訴時卽當將伊桑阿前後辦理草率情形據實參奏方爲公正乃該督並無一言提及其意以伊桑阿前在新疆時曾經參奏琅玕家人私販玉石一事此次若將伊桑阿參奏轉似有心報復故爾隱忍不言卽此一念亦屬私見朕於臣下功罪賞罰務在持平豈可令飾

奏冒功之人濫邀優敘以上指出情節皆係黔省官民共見共聞之事著傳諭琅玕密行陳奏如伊桑阿並未親赴石峴軍營而滋事首逆亦未擒獲多人則前奏盡屬虛謊該督一面奏聞一面傳旨令伊桑阿來京候旨卽兼署撫篆如伊桑阿實無其事亦卽據實覆奏○戊辰諭京城一帶雨水連綿永定河漫水泛溢被災貧民口食無資流離失所節次特派大臣等查災給賑一切加惠黎民之事如截漕蠲賦煮賑諸務雖已次第舉行而朕心軫念民艱寢食不安宵旰焦勞仍無時或釋慮各員或有拘迂經理未能妥協廬懷尤甚卽如前日汪承霈等奏永定門右安門外關廂一帶往往有假託災民前往散賑處所冒領一節雖經降旨令其於放賑時留心查察但思附近居民如果衣食並未缺乏豈肯改裝乞丐經行泥淖之中冒此區區口食實非情理至京城內原有求乞

之人朕在藩邸時常經目覩卽無災之年亦不能免難保非因被災乏食聞知設廠給賑前往覓食同一窮民皆朕赤子一視同仁豈忍加之區別不行散給乎况災民等嗷嗷待哺不能稍緩須臾若必一一查明始行分給勢必過事盤詰其實在飢困不前者轉未免有所遺漏辦賑之道總在周施博濟甯濫無遺若期不濫則必有遺卽有一二冒領之人皆係窮苦百姓又何忍斤斤較量耶又據明安面奏見在發帑賑濟而官民內有自出己貲散給銀米者應請禁止汪承霈又面奏官賑與私捐不應攙雜一處俱屬見小不知政體經朕面加駁斥試思官員等皆食祿於朝稍有捐助孰非公家之物朕聞見在部員中卽有查有圻盛時彥等捐給銀米有何不合至殷實商民受國家涵育深仁積有餘貲伊等樂善好施更屬美事將來事畢後尙當查明官員內有捐貲較多者加

恩甄敘商民等亦應酌賞頂帶或官給扁額以示獎勵方嘉許之
不暇豈有轉行禁止之理若云官賑私捐慮其攙雜亦斷無欽派
大員等在彼散發口糧而私捐之官民等率行爭先散給之事况
官賑之外又有私捐接濟飢民多得一分口食豈不更資果腹耶
近日並有人在朕前奏及近畿災民紛紛至京竟有被各門攔截
者更屬大謬見在五城設立飯廠窮民等自必聞風踵至豈可轉
行阻禁况此等被水難民皆由本處無可逃行是以遠赴京師就
食朕念切痼瘼無論遠近災黎甯忍稍分畛域前已降旨令直隸
地方官分段設廠煮賑伊等知本處可以就近得食亦必漸歸鄉
里又何忍驅逐禁止乎總之多救一民減朕一分之罪惟在辦賑
各員等仰體朕子惠元元如傷在抱至意實力妥辦毋使一夫失
所方足以拯流離而挽災祲將此通諭知之○己巳撥京倉稜米

二千四百石局錢千緡賑永定右安門外災民○免順天府香河等四州縣直隸清苑等三十四州縣額賦順天府密雲縣直隸正定等十八州縣額賦十分之五○辛未 上步詣 社稷壇祈晴○是日晴○壬申軍機大臣刑部審擬姜晟等貽誤河工分別治罪請將已革總督姜晟發往軍臺已革永定河道王念孫發往烏魯木齊效力贖罪已革同知翟萼雲陳煜汪廷樞發往伊犁充當苦差奏上免姜晟等罪均發往永定河工效力○勒保奏勦辦東鄉青藍兩號賊匪悉數殲除得旨嘉獎賞四品翎頂○再撥大興縣倉穀一千石銀二千兩接賑災民○癸酉撫恤天津被水災民